

Powšitkowne WOZJEWJENJA

njedźelu, 24. awgusta 2025

Počesća třoch Zejičanow

Zejičanska wjesna zhromadnosć, Maćica Serbska z.t. a Towarstwo Cyrila a Metoda z.t. přeprošuja wšitkich na poswjećenje pomnika za prelata a čestneho kanonika Jakuba Buka, kanonika Michała Buka a kanonika Jakuba Šubu. Wšitcy tři su rodzeni Zejičenjo. Chróšćanski farar Měrćin Deleršk poswjeći pomnik, kotryž změje swoje město při wjesnym swjatym křížu, tutu njedźelu, 24. awgusta, w 15.00 hodź. Farar Beno Jakubaš wosobiny předstaji. Cyrkwinski chór a dujerjo Chróšćanskeje wosady swjatočnosć wobrubja. Po njej su wšitcy na swačinu přeprošeni. Awta smědža na parkowanišću při křížowanišću wotstajić.

Lětni koncert w Radworju

Chór Meja přeproša wšitkich zajimcow na swój lětni koncert na zahrodze při Radworskej farskej cyrkwi, kotryž budže njedźelu, 31. awgusta, w 16.00 hodź. Program wuhotuje zhromadnje ze skupinu „Wólbernosće“. Wot 15.30 hodź. poskićuja swačinu.

Zetkanje samostejacych

Samostejacy ze serbskich wosadow su na dalše zetkanje wutoru, 2. septembra, w 14.00 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 26. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy, kotřiž njesu samostejacy, su tohorunja wutrobnje witani. Kóždy njech sej Wosadnik sobu přinjese. Štóž chce wotewzaty być, njech to prošu zdžěli.

Wustajeńca z mólbami

Wustajeńca z mólbami Marija Ošiki budže znova w Chróšćanskim gmejnskim zarjedze přistupna, a to wot wutory do štwórtka, 2. do 18. septembra, k wotewrjenskim časam zarjada: póndźelu, wutoru a štwórtk wot 9.00 do 12.00 hodź., wutoru tohorunja wot 14.00 do 17.30 hodź. a štwórtk wot 14.00 do 16.00 hodź. Tam móža sej zajimcy tohorunja knihu wuměłca „Za wokeńcu – Einblicke“ za 17 eurow kupić.

Nóc wotewrjenych cyrkwjow we Wojerecach

Na Nóc wotewrjenych cyrkwjow su wšitcy zajimcy do Wojerec přeprošeni. Wona budže wot pjatka do soboty, 29. do 30. awgusta, a to do Sakskeje krajneje domchowanki srjedź septembra, kotraž so tónraz w měsće wotměje. Wotewrjene budu wšelake Bože domy we Wojerecach a wokolinje. Zdobom poskićuja wosady wšelake zarjadowanja, mjez druhim Bože služby a koncerty. Link k dalším informacijam je pod www.posol.de wozjewjeny.

Młodostni na dwudnjowsku kublansku jězbu přeprošeni

Serbskich młodostnych přeprošuje Towarstwo Cyrila a Metoda z.t. (TCM) na jězbu do Dachauwa a Mnichowa. Při tym póndže mjez druhim wo přesčěhanje Serbow za čas nacionalsocializma, wosebje na přikładže zbóžneho kapłana Alojsa Andrickeho. Bus wotjědže pjatk, 3. oktobra, w 6.00 hodž. Nawrót je za sobotu, 4. oktobra, wokoło 20.00 hodž. planowany. Předwidžane je přeni dzeń popołdnu wodženje po Dachauskim wopomnišću koncentraciskeho lěhwa, hdžež su wjacori serbscy duchowni zajeći byli. Na pózdnim popołdnu je w klóštrje karmelitkow na teritoriju wopomnišća Boža mša skazana. Nazajtra wopytaja wobdžělnicy jězby w Mnichowje pomnik za wopory nacionalsocializma. Wo dalšu wosebitostku so TCM hišće stara. Na zažnym popołdnu so na dompuć nastaja. Jězba z přenocowanjom a zastaranjom płaći 50,00 eurow. Přihotowanske zetkanje budže sobotu, 27. septembra, w 14.00 hodž. w Radworju na farje. Na jězbu přeprošeni su wšitcy zajimowani młodostni, wosebje ói, kotřiž budu lětsa do wosadneje młodžiny přiwzaći. Za to měli so woni online přizjewić. Link je pod www.posol.de wozjewjeny.

Zastupne lisćiki za pasionske předstajenje online kupić

Za inscenaciju pasionskeje hry „Sčěhuj mje!“ lětsa w septembru w Chrósćicach móža sej zajimcy zastupne lisćiki online kupić. W padže, zo by zarjadowar jednotliwe předstajenje wotprajić dyrbjał, wón pjenjezy kupcam wróci. Link na přistup je pod www.posol.de a tam pod wotkazom na pasionsku hru wozjewjeny. Tam su tež płaćizny podate. Na plakatach a flajerach nańdu zajimcy QR-code na wotpowědnu stronu. Tež při kasy móža sej zajimcy lisćik kupić. Towarstwo Cyrila a Metoda z.t. (TCM) předstaji pasionsku hru zhromadnje z Chróšćanskej wosadu pjatk a sobotu, 5. a 6. septembra, w 19.30 hodž., njeźelu, 7. septembra, w 16.00 hodž., kaž tež sobotu a njeźelu, 13. a 14. septembra, w 19.30 hodž. w Chrósćicach na farskej lúce.

Džěłarnička ikonografije „wobraz a słowo“ za młodostnych

Młodostni, maće lóšt na workshop, wulět a wuměnu z pólskimi młodostnymi? To wšitko móžeće wot pjatka do soboty, 19. do 20. septembra, w „Domje Gerharta Hauptmanna“ w Jelenjej Górje dožiwić. Čehodla džěłarnička ikonografije? Pisanje ikonow słuša k rědkim wuměłstwam. Ikona je uniwersum, wobstejacy z mnohich tradicijow a technikow, kotrež buchu wot generacije ke generaciji na wšelakich městnach a we wšelakich nabožinach dale dawane a hač do džensnišeho posrědkowane. Tuž budžće wotewrjeni a wćipni za nowe impulsy a kulturnu wuměnu mjez młodostnymi. Při přizjewjenju pod sekretariat@sorbisches-museum.de maće mjeno, adresu, starobu a swoje telefonowe čisło podać. Interreg Pólska-Sakska a Euroregion Nysa projekt spěchujetej. Tohodla směće so jako młodostni darmotnje wobdžělić. Wjace informacijow nańdžće na stronje Serbskeho muzeja www.sorbisches-museum.de.

M. Ošikowa